



N°340  
Entrée le 15.02.2024  
Chambre des Députés  
Déclarée recevable  
Président de la Chambre des Députés  
(s.) Claude Wiseler  
Luxembourg, le 16.02.2024 Chambre  
des Députés

Claude WISELER  
President vun der  
Chamber vun den Deputéierten  
19, um Krautmaart  
L-1728 Lëtzebuerg

Lëtzebuerg, den 15/02/2024

Här President,

**Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministère fir Gesondheet & Finanzen weiderzeleeden.**

Opbauend op de vun der Fondation Cancer publizéierten Zuelen zum Tubakskonsum zu Lëtzebuerg ass feststellen, dass mir op nationalem Niveau nach wäit fort si vum europäeschem Ziel den Tubakskonsum bis 2040 op 5% ze reduzéieren.

Den Tubakskonsum gëtt an de leschte Joren och ugedriwwe vun neie Produiten déi op de Marché komm sinn, de sougenannten „New Gen Products“, dorënner falen zum Beispill Produite wéi „Puffs“ an och „SNUS“. Iwwert d'Verbreedung vun dëse Produiten op nationalem Niveau ginn et aktuell, obwuel de Ministère d'Gefor erkennt, keng Etuden oder Zuelen.

De Plan national de Lutte contre le Tabagisme (PNLT), deen am Joer 2020 ausgelaf ass, gesäit vill Evaluatiounen vir, virun allem sollt zum Schluss eng extern Etude folgend Ziler areeche: „Une évaluation externe finale en 2020, qui permettra de faire le point sur les résultats atteints et non atteints, ainsi que sur les points critiques à intégrer dans le PNLT suivant.“ Dann gesäit den Agenda vum leschte PNLT och eng final Phase vir, wou opbauend op de Konklusiounen e PNLT 2021-2025 soll ausgeschafft ginn.

An der leschter Legislaturperiod sinn dann och 6 Aarbechtsgruppen (de Gesondheetsdësch) agefouert ginn, wou et ënnert anerem och ëm de Sujet vum Tubakskonsum sollt goen. Aktuell ass zur Entwécklung vun dësen Echangingen näischt méi gewosst an déi dedéiert Websäit ass aktuell net méi registréiert.

An den Äntwerten op rezent parlamentaresch Froen am Kader vum Tubakskonsum zu Lëtzebuerg sinn et och keng weider präzis Informatiounen ginn. Esou ass am Kader vun den Nikotin-Säckelcher gesot ginn, dass d'Regierung gegebenefalls ee legale Kader ausschafft, ouni e konkreten Zäitplang festzeleeën. De Finanzminister huet am Kader vun enger anerer parlamentarescher Fro vun „Reflexiounen“ geschwat betreffend enger méiglecher Präiserhéijung vum Tabak op nationalem Niveau.

Trotz oppene Froen an engem vum Ministère confirméierte Manktem un Zuelen, huet Lëtzebuerg am Kader vun neien Tabaksproduiten d'Initiative ergraff an a senger Amendementsproposen zur Direktive



[www.piraten.lu](http://www.piraten.lu)

(EU)2015/1535 e Verbuet vun „pochettes de nicotine“ gefuerdert.

Villes bleift trotzdeem éischter vage, konkret Äntwerte loosse op sech waarden an europäesch Zilsetzung schéngen aktuell net realistesch.

An deem Zesummenhang wéilt ech de Ministeren dës Froen stellen:

1. Sinn d'Evaluatiounen zum leschte PNLT alleguerten ofgeschloss? Falls jo, wéini ginn d'Konklusiounen publizéiert? Falls nee, wéi een Zäitplang ass hei festgeluecht ginn?
2. Wou sinn d'Aarbechten zum neie PNLT drun? Wéi een Zäitplang ass hei festgeluecht ginn?
3. Wat wäerten déi grouss Prioritéite vum neie PNLT sinn?
4. Wäerten déi nei Generatioun un Tubaksproduiten och Deel vum neie PNLT sinn?
5. Wäerten d'Gesondheetsdëscher aus der leschter Legislaturperiod an domat den Echange mat villen Acteuren vum Terrain weidergefouert ginn? Falls nee, aus wéi enge Grënn ginn dës net weidergefouert?
6. Wäert de Budget fir d'Joer 2024 Recetten aus méiglechen Taxen op elektronischen Zigaretten an Nikotin-Säckelchen enthalen?
7. Op Basis vu wéi engem Zuelen, Observatiounen, Echangë mat betreffenen Acteuren a Konklusiounen ass d'Entscheidung getraff ginn den uewen zitéierten Amendement am Kader vun der Direktive (EU)2015/1535 ze proposéieren?

Mat déiwem Respekt,



CLEMENT Sven  
Deputéierten





LE GOUVERNEMENT  
DU GRAND-DUCHÉ DE LUXEMBOURG  
Ministère de la Santé  
et de la Sécurité sociale

**Gemeinsam Äntwert vun der Madamm Ministesch fir Gesondheet a sozial Sécherheet a vum Här Finanzminister op d'parlamentaresch Fro n° 340 vum 15. Februar 2024 vum honorabelen Deputéierten Här Sven Clement.**

1. Sinn d'Evaluatiounen zum leschte PNLT allequerten ofgeschloss? Falls jo, wéini ginn d'Konklusiounen publizéiert? Falls nee, wéi een Zäitplang ass hei festgeluecht ginn?

2. Wou sinn d'Aarbechten zum neie PNLT drun? Wéi een Zäitplang ass hei festgeluecht ginn?

3. Wat wäerten déi grouss Prioritéite vum neie PNLT sinn?

Wéi den Accord de coalition erkläert, wäerten all d'Pläng a Programmen eng Qualitéits- an Effizienzanalyse duerchlafen. Je no de Resultater vun dësen Analysen wäerten déi néideg Upassungen virgeholl ginn.

4. Wäerten déi nei Generatioun un Tubaksproduiten och Deel vum neie PNLT sinn?

Déi nei Generatioun un Tubaksproduiten wäerten an eiser Lutte géint den Tabagisme mat ofgedeckt ginn.

5. Wäerten d'Gesondheitsdëscher aus der leschter Legislaturperiod an domat den Echange mat villen Acteure vum Terrain weidergefouert ginn? Falls nee, aus wéi enge Grënn ginn dës net weidergefouert?

Den direkten Echange mat den Acteure vum Terrain ass fir déi nei Regierung immens wichteg. Dee wäert selon les besoins en bilatéral oder an enger méi grousser Concertatioun mat de verschiddenen Acteure statt fannen.

6. Wäert de Budget fir d'Joer 2024 Recetten aus méiglechen Taxen op elektronischen Zigaretten an Nikotin-Säckelcher enthalten?

De Budgetgesetzesprojet fir d'Joer 2024 (n°8383), deen de 6. März 2024 an der Chamber déposiert gouf, gesäit vir, dass d'E-Liquiden fir elektronesch Zigaretten an d'Nikotin-Säckelcher vum 1. Oktober 2024 un, zu Lëtzebuerg mat Akzise besteiert ginn. Ee groussherzoglecht Reglement, dat parallel zum virgenannte Budgetgesetz op den Instanzewee geschéckt gouf, gesäit effektiv Tauxe vun 120€/Liter fir d'E-Liquiden an 22€/kg fir d'Nikotin-Säckelcher vir.

7. Op Basis vu wéi engen Zuelen, Observatiounen, Echangë mat betreffenen Acteuren a Konklusiounen ass d'Entscheidung getraff ginn den uewen zitéierten Amendement am Kader vun der Directive (EU)2015/1535 ze proposéieren?

Deen zitéierten Amendement ass ni déposiert ginn. De Projet de loi deen ënnerwee ass setzt d'Directive em a gëtt esou wéi an der Äntwert 6 beschriwwen kompletéiert.

Lëtzebuerg, den 19. März 2024

D'Ministesch fir Gesondheet  
a sozial Sécherheet

(s.) Martine Deprez